

միայն անուններն են փոխված»²⁷, վերաբերում է ոչ այնքան Դավ-
րիժեցու դիտավորությանն ու գրական-ստեղծագործական անկա-
րողությանը, որքան հենց այն կարծրակաղապարներին, որոնք
տվյալ ժամանակաշրջանում արդեն նկատելի էին վկայաբանական
ժանրերի համակարգում և դրսևորվում էին ոչ միայն կառուցված-
քային, այլև բովանդակային հարթություններում:

Կաղապարային է ամենից առաջ վկայաբանությունների
վերնագրային պոետիկան՝ **վասն այսինչ անվամբ քրիստոնյայի
նահապարկության**: Այսպիսի դեպքերում պատմագրության գլուխ-
ների վերնագրերը նաև ժանրային բնորոշումներ են կամ
ժանրային պատկանելության ցուցիչներ:

Կաղապարային են նաև ներտեքստային մի շարք միավոր-
ներ: Այդ առումով ամենաակնառուն հակիրճ վարքի ու դիմանկա-
րի պարտադիր առկայությունն է վկայաբանության սկսվածքում:
Ճիշտ է, դիմանկարն այս պարագային դրսևորվում է իր մասնա-
վոր, այսպես ասած՝ հոգևոր նկարագրի կերտմամբ, բուն դիմա-
նկարային մանրամասնությունները սակավադեպ են, իսկ եղած
դեպքերում էլ՝ պարզապես լրացնում են հոգևոր նկարագիրը:
Սկսվածքի այդ կաղապարային նրբագծերը հստակ պատկերաց-
նելու համար բերենք երկու տարբեր վկայաբանությունների՝
հերոսներին ներկայացնող մասը.

ա) «Այս երանելի նահատակս Նիկողայոս էր ի քաղաքէն
Տիգրանակերտու, որ այժմ ասի Ամիթ, ծնեալ և սնեալ ի նոյն քա-
ղաքին, և էր մանուկ տիօք իբրև տասն և հնգից ամաց, տեսլեամբն
գեղեցիկ՝ և հասական վայելուչ, զաւակ քրիստոնէից, և ազգաւ ի
Հայոց» (էջ 400–401).

բ) «Այս երանելի նահատակս Խաչատուր էր ի քաղաքէն
Տիգրանակերտու՝ որ այժմ ասի Ամիթ, ծնեալ և սնեալ ի նմին

²⁷ **Լևոն Բաբայան**, Դրվագներ Հայաստանի XIV–XVIII դարերի պատմագրության,
Երևան, 1984, էջ 126: